

雷波廳志卷二十三

列女志

詩首關雎詠歌聖德幽靜貞嫻聞於四國百世而還
徽音未息下戶編氓猶知壺則或貞以烈或慧而賢
能葆其性不負所天

聖明在上褒及九泉嗟爾巾幗當知勉焉志列女第二十三
賢淑

周氏吳玉恆妻善事翁姑克修婦職姑任抱病危殆
勢將不起氏割股和湯以進病遂瘳生平性情和厚

雷波廳志

卷二十三 列女

一

治家勤能撫教諸子尤嚴內訓長子洪晏仕爲貴州
通判餘子亦列膠庠光緒元年逢

覃恩

誥封宜人鄉隣欽仰以爲教子有方

曾氏李懷昌妻秉性溫厚慎重寡言事翁姑克盡婦
道晚年子孫眾多撫愛無異視至九十八歲乃終
陳氏羅朝良妻年十八歸朝良克嫻內則善事舅姑
治家政亦井井有條井臼躬操力敦勤儉生子五人
嚴於內訓教育有方長子廷棟邑庠次廷樑歲貢生

三廷柱恩貢生候選教諭光緒十六年逢

覃恩

誥封安人年八十二康強依舊

熊氏東林鄉人庠生熊時毓胞妹貢生熊光烈堂姑
幼字廖正福稍長得足疾不良於行父憐之欲留養
於家諷令正福他娶正福不肯從曰吾聘女在前女
得病在後此非人所爲天也吾誓不爲不義因娶之
既入門敬事其姑克盡婦道逾年生一女正福遠遊
於外數載不歸至無信息或勸婦再醮婦泫然曰吾

雷波廳志

卷二十三 列女

二

夫昔娶我義吾何忍負之况吾母猶在夫弟又新亡
廖氏無人我去母安歸異日何以見吾夫於地下由
此誓志苦守終身不二日唯勤事鍼黹以事其姑雖
困苦無所怨計婦苦守歷三十餘年年逾六十姑年
八十有四均尙存

李氏王聯科妻其先本廳人後遷雲南之木杆河力
耕而食同治辛未歲逆夷渡江擾滇夫婦同被擄夷
性慘虐所擄無論男女皆束縛而褫其衣驅之疾走
婦不勝凌藉欲投崖死夫密語之曰汝娠七月餘矣

倘生男幸爲我家延一線汝死吾無望矣婦泣起勉行至夷巢撥歸黑夷乾兒家給以地爲奴仍令聚首逾兩月舉一男住夷巢數年衣服言語悉夷矣其夫安之無歸志婦泣而言曰君將樂此不歸乎抑猶有故土之思而爲先人宗祀地也君旣陷於夷兒又生長夷中不知姓氏從此世世子孫皆爲夷種先人不血食矣盍早圖之夫謂我本欲逃第恐爲汝累且我去兒又安能歸婦曰君第去吾自有辭十年後吾使兒尋君於廳城百里內夫從其語遂逃兒漸長怪母

雷波廳志

卷二十三 列女

三

不類諸夷問之婦初不言比成人乃秘告之且教以漢語復畫計使逃兒戀母不肯行婦曰此豈吾之初志哉吾忍恥艱難所以不卽死者爲汝一塊肉欲存王氏也若長在夷中吾何須於汝汝可速去倘邀天幸能父子重逢則吾之志願遂雖死之日猶生之年矣兒不得已乃逃至東林鄉適逢其父相聚如初今年夏閒廳主秦公巡視各鄉至其地父子叩馬前泣訴公廉得其情嘆曰此賢婦人也旣知大義復饒智機能脫夫與子於阨忍令其久沒夷中乎因嚴飭聽

差各夷清查繳出後得信還報婦於子去之後已不食死矣聞者莫不嘆息

夷婦吳奇氏牛吃水鄉夷民盧正秀妻也母家吳奇支在諸番中最爲强大適正秀數載耕作鄉居恪守漢法光緒元年四月生番叛亂糾眾數千突犯牛吃水圍攻場市我軍不及救援勢已將陷吳奇氏隻身犯難入賊中口操夷音令諸賊解圍去賊眾不從氏號哭脫所服下裙鋪於地狀若尋死賊眾見之不敢越其裙遂各解去原夷俗重女又畏冤家若越其裙

雷波廳志

卷二十三 列女

四

則爲氏大辱必死之其冤家至數世不解以此賊率眾去次日援軍至而場乃得全皆氏保護之力也

貞孝

沈氏名小泉營兵沈萬洪女萬洪無子生六女皆嫁晚得小泉愛之教令讀書微解大意既長念父母皆邁無兄弟誰奉以終因矢志不嫁終身以養父母家貧衣食常不給困阨之境人所不堪女鍼黹謀生善承色笑其奉養逾於男子母先亡父萬洪八十餘精神衰憊動作艱難或臥病數日不起女出入扶持體

貼微至始終如一未嘗怠忽今已四十餘歲親族隣里罕識其面皆憫其孤苦而欽其貞孝云

義烈

黃氏張信弼妻適信弼五年居狎子村鄉勤儉務農夫婦和睦雇工吳俸傭於信弼家見婦少艾欲調之婦莊重無可乘乾隆五十四年四月初五日天甫明婦猶在牀臥信弼早起乞火於隣隣人遠在半里外信弼至其家爲所牽制逾時未歸吳俸遂入婦房巧言調戲婦不從以刀逼之婦急欲號俸以刀砍傷其頭頸自知罪重無所逃回房自縊信弼歸見婦呻吟問之略言其由急尋吳俸則已死因呼隣里集視共鳴於官官至婦已氣絕檢驗得實詳細上稟五十五年奉

雷波廳志

卷二十三 列女

五

旨旌表發銀三十兩建坊於東門外道光十九年前任廳主劉公耀庚易其坊紀其修城功於上另立一片石書婦姓名幾至泯滅光緒十八年廳主秦公憫其苦節就湮集貲購材另建新坊於東關道上以表揚之黃氏黑角汛兵宋恆才妻夫婦和睦相敬如賓恆才

得寒疾服侍湯藥晝夜不懈後病勢垂危醫藥罔效
氏禱於天願以身代然病竟不起死之日痛哭昏迷
誓以身殉勉起親視含殮停柩於堂迺入室更衣服
毒殞命家人舉而並葬之噫窮鄉軍伍而能赴義從
容夫亦可以風矣

完節

羅氏把總毛兆鸞妻年二十五孀居守節歷七十八
歲而終

袁氏廩生薛凌雲妻翁首傳貴州大定協副將凌雲

雷波廳志

卷二十三 列女

六

歿時氏年二十六子瑾甫數齡氏矢志撫孤教之成
立瑾善體母教爲人端謹多才能乾隆中臬憲多歡
來雷勦辦夷務檄瑾辦理地方事宜深資倚畀事竣
賜公愼勤明匾額以獎之皆得力於母教也氏苦守
五十年至七十餘歲乃終

李氏許祖源妻夫死苦守五十四年撫其孫盛朝成
立遊庠嘉慶十九年提督學院趙賜賢烈孝慈匾額
以旌之

張氏羅明發妻守節數十年苦節彰著

徐氏蕭文斌妻青年矢志白首完貞 以上列省志
吳氏張高翰妻孀居守節善事翁姑子文彩年九歲
出就外傅課讀綦嚴後入學補廩氏苦守四十年歷
六十八歲而終 嘉慶二十四年

旌表

吳氏歐陽尙信妻尙信身故遺腹生一女乃撫兄子
爲嗣並撫夫異母弟尙琮等五人成人賢聲卓著鄉
黨咸稱苦守五十二年而歿

邵氏陳金科妻年十九歸金科甫四十五日而金科

雷波廳志

卷二十三 列女

七

病故氏矢志守節以兄子國華爲嗣足迹不出戶庭
親眷罕識其面秉性純孝姑病篤曾割股救之臨死
以示其家人傷處血痕如珠隱存肉內族人_有爭產
致訟者氏捐己田與之乃罷訟其德行如此子國華
讀書遊庠後貢成均皆氏之教也同治八年御史吳
鎮奏請

旌表

楊氏朱芳玉妻芳玉娶時已病危俗謂娶妻沖喜病
易痊好乃四十日而芳玉身故因撫兄子應魁爲嗣

矢志苦守歷五十餘年從未一歸母家親眷至者亦莫覩其面專靜純一里黨共欽年七十餘而卒

以上皆同

旌表
治朝

曹氏陳萬朝妻道光十七年萬朝隨征夷匪至羊子橋陣亡子世瑞僅數齡翁姑健在家貧苦衣食維艱氏勵節苦守雖貧無怨事翁姑尤克盡婦道孝敬無違臨歿喪葬盡禮撫一妹成人經營遣嫁仰事俯蓄皆一身任之其教孤子亦最嚴不事姑息後世瑞由吏員起家因勦夷匪出力以縣丞用孫鶴齡由恩貢

雷波廳志

卷二十三 列女

八

生保舉經歷皆氏教育所致晚年康強逢吉子孫繁衍至七十餘而終

舒氏劉昌有妻夫死守志歷五十七年性慈愛子孫眾多撫之如一子文科孫明照均教育成名膝下曾元繼起五世同堂氏皆親見次子文經婦姜氏亦以苦節稱

姜氏劉文經妻舒氏媳也文經應童子試沒于江氏年二十四勵志苦守事姑以孝聞撫孤子明玉成立內訓維嚴治家亦勤儉晚年家計稍裕明玉易名錫

庸援例爲太學生孫曾繼起皆氏苦節所致也

徐氏武弁李開遠妻道光十七年夷匪擾亂開遠奉
派出征至羊子橋陣亡氏年二十三矢志苦守撫孤
子景鏞成立歷七十歲而終

劉氏羅桂芳妻桂芳身故氏年二十六家計窮阨矢
志撫孤後子死遺一孫氏復多方撫育至於成立計
守四十六年歷七十餘歲而終

鄧氏錢正樑妻正樑病故氏年二十五苦守三十年
歷五十五歲而終

雷波廳志

卷二十三

列女

九

周氏羅洪德妻洪德病故氏年二十八守節三十九
年遺孫鳴謙撫之成立多方教導後入邑庠氏年七
十餘卒 以上光緒六年

旌表

陳氏許啟恆妻生員壽康胞妹性情和順舉止端莊
翁父蘭村亦宿儒言動皆有法度氏撫孤勵節事親
以孝聞苦守三十餘年始終如一子文最爲人謹飭
不干非義知其母教有素也

胡氏封啟仁妻夫死鄉居以耕爲業治家勤儉教子

有方子俊龍由行伍起家歷任馬頸子汛千總晚年家稍落處之怡然年七十餘卒

楊氏華宏永妻苦守五十餘年善事翁姑克全節操年八十五

蔡氏姜先政妻夫歿守志撫子成立事翁姑孝敬無違年七十四卒

陳氏蕭逢福妻勵節撫孤事親克孝苦守六十三年乃卒

鄧氏歐陽國楨妻孀居守志苦節四十餘年

雷波廳志

卷二十三

列女

十

任氏劉自超妻夫死守志歷三十餘年苦節彌堅

吳氏周榮富年二十二孀居守志始終不渝

劉氏張啟棟妻夫亡守志撫子終身

羅氏曾芳明妻夫故撫子成立守節四十三年

錢氏沈萬忠妻夫亡守志撫子成人鄉居勤苦克全

節操

以上光緒十七年

旌表

蕭氏李春仁妻年二十七春仁病故遺三子均幼撫之成立教育有方及長皆能自立長玉元季玉芳均

由武弁征匪陣亡玉元子化昌亦救父死于難皆有傳道光二十五年逢

國大慶

誥封安人至八十四歲而終孫化昌妻鄒氏峩邊廳人化昌殉父難鄒氏誓志死守因翁玉元宦峩邊久母家亦在峩遂留居住仃伶孤苦守志二十五年而歿峩眉縣黃令上其事於

朝得

旨旌表建坊在□邊龍池場外忠孝節義萃於一門尤爲

雷波廳志

卷二十三 列女

十一

世所難云 以下皆未旌表

劉氏歐陽依燕妻依燕病故氏年二十二家貧無所依幸母家不時給之聊得存活矢志苦守終身不渝嗣一子國龍撫之成立刻責綦嚴國龍體母志游學於隆昌後乃入類氏苦守五十載歷七十餘歲而終國龍中年而天竟絕嗣人咸惜之

許氏劉濟通妻年二十四孀居守志撫孤子琨禮成立教育有方琨禮子三長清明次清波均入廳學清明尤負才名氏親見五代年百歲乃終提督學院鍾

賜期頤衍慶匾額以旌之

曾氏文生羅廷棟妻青年早寡勵節撫孤性靜默寡言不爲厲言遽色上事翁姑曲全孝道待姊妹伯叔和平有禮生平未嘗詬爭現年六十一

楊氏貢生羅廷樑妻年二十五孀居誓志苦守不改其操無嗣息撫夫弟廷柱子承祧勵節三十餘年白首完貞外人罕覩其面現年六十有二

吳氏楊世和妻年二十三孀居守志二子春林春發撫之成立治家勤儉篤守耕耘現年七十二世居馬

雷波廳志

卷二十三 列女

十二

頸子汛花椒坪窮鄉僻壤以苦節著人咸稱之

羅氏譚應舉妻夫死守節事翁姑以孝聞家貧四子皆幼艱難困苦撫之成人四子遵母教爲人誠篤以耕爲業孫數人皆成立嗣續繁昌氏現年七十一

陳氏李錦壽妻青年守節矢志撫孤歷五十年而歿歐陽氏醫生黃太和妻年二十三孀居守志家貧以鍼黹度日撫二子成人苦節四十餘載

陳氏劉綜先妻青年守志撫子澤恩成人讀書納監現年七十賢聲卓著

許氏周學朋妻年二十四生二子其夫臥病年餘侍奉湯藥無懈夫歿家徒壁立鬻簪珥以葬艱難困苦撫子成人勵節五十五年至七十九歲而終

陳氏趙元壽妻牛吃水香煙壩人年二十二孀居家貧衣食不給氏誓志苦守撫子建忠成人母子相依以耕爲業咸豐三年夷匪擾香煙壩氏年七十七建忠負之逃不能行遠母子皆及於亂建忠有傳

劉氏沈崇德妻崇德病故遺三子皆幼氏勵節撫孤家徒壁立因遷於蠻溪口往依母家後遭夷亂復攜

雷波廳志

卷二十三 列女

十三

三子回廳城勤苦度日教育成人三子正義由行伍立功補授普安右營把總晚年精神強健至八十八歲尙無恙云

馬氏周正常妻青年守志撫三子七女均成人畢其婚嫁至九十八歲而終

張氏吳洪儒妻年二十六孀居翁姑在堂盡心服侍後病歿喪葬盡禮一子一女均幼撫之成人並教其孫宗澤入武庠年八十七卒

劉氏翟敬堂妻道光十七年夷匪叛亂敬堂奉派出

師至羊子橋陣亡氏年二十七子甫三歲撫之成人
事姑以孝勵節葆貞五十餘年至八十歲乃終
周氏王世材妻性嚴正舉止端方不妄言笑年二十
三夫亡守志辛苦撫孤現逾六旬堅操如故親黨咸
敬重之

羅氏濫壩子鄉農民袁第坤妻也第坤兄嫂早歿遺
二子皆幼氏鞠養之第坤卒時氏年二十七其祖姑
暨姑均在堂家既貧苦又值夷患頻仍流離遷徙窘
迫殆不可以言狀仰事俯畜皆一身任之上事兩姑

雷波廳志

卷二十三

列女

十四

孝養無違下撫二子及兩姪均恩愛無異視辛苦三
十餘年兩姑相繼逝極力營葬子姪亦撫養成人務
農耕作親戚鄉黨莫不憫其苦節云

董氏鄭章敏妻娶甫一年而章敏身故氏年十八子
毓和生未及歲矢志苦守教之成立毓和讀書未成
援例納監至今家道稍裕飲食有資皆氏勤儉所致
今尙存

劉氏羅元福妻夫死孀居上事翁姑下撫二子廷杰
廷貴皆成立至五十六歲終

劉氏文童李春馨妻娶未一年春馨赴省游學卒於成都氏年二十遺腹生一子名廷相勵志撫孤性靜默寡言事翁姑克盡婦職祖姑曾氏年九十餘昏眊不省人事盡心服侍未嘗或疎後曾病臥半載至溺於牀臭穢不可嚮邇氏衣不解帶勤加滌濯無稍愠怠曾年九十八乃終氏苦守二十六年節孝完備人皆稱之

劉氏文生姜世珍妻年二十四孀居矢志撫孤清苦自勵祖父祖姑皆年老氏盡心服侍以終其年未嘗

雷波廳志

卷二十三 列女

十五

稍懈

劉氏武生傅國賓妻生一子一女夫死氏年二十四以苦節自勵撫子女成人畢完婚嫁勤儉持家人稱賢淑

吳氏周榮昭妻夫死年二十二遺腹生一子氏撫之成人雖貧無怨今已五十餘歲

羅氏楊代皋妻年十六適代皋逾年生子代皋卽病故姑年老雙目不明子生未及歲他無伯叔兄弟鮮所依賴氏矢志不二仰事俯畜備極辛勤姑年九十

五乃終喪葬盡禮子生霖撫教成人讀書應試氏年六十四尙存

王氏林相位妻年二十一生子仕銓甫三日相位病故氏撫孤守節謹事翁姑年四十六卒

戴氏林宜棟妻年二十三夫死家貧撫三歲孤兒成立霜操獨懷五十六歲卒

汪氏童正剛妻正剛病故家貧無所依勵節苦守撫孤子柏壽成人爲之娶妻翟氏逾年見孫甫半歲而柏壽亦故翟年十八矢志不二以紡績事其姑協心

雷波廳志

卷二十三 列女

十六

教子至今孫亦成人爾世孀居相依爲命汪年六十四翟年四十八均尙存

曾氏武生李國忠妻國忠自省歸渡江溺死氏年二十三聞變誓以死守或諷再醮涕泣絕之無子唯一幼女孤苦相依因撫兄子以延夫嗣於奉事翁姑外兼勤紡績以佐衣食雖困苦無怨詞現年四十六
廖氏文生吳洪業妻洪業從軍於黔積勞病故氏年二十七撫孤守節教子有方今尙存年五十餘

袁氏黃富才妻年二十五孀居三子皆幼氏仃伶孤

苦撫子成人勤儉持家晚年漸裕三子遵奉母教力耕務農氏年六十尙强健云

孫氏余文陞妻生二男一女其夫貿易歸覆舟以歿氏年二十三事姑以孝聞越十年姑死喪葬盡禮子女成人畢完婚嫁年六十終

賴氏庠生龍見田妻年二十七見田病故長子煥章甫四歲次駿章生四閱月氏撫孤守志辛苦備嘗教二子尤刻至煥章後入邑庠駿章亦屢應童試列前茅因家貧廢學氏年七十二乃終

雷波廳志

卷二十三 列女

十七

廖氏楊永貞妻職員廖壽昌女也適永貞逾年卽故年十八以弟子爲嗣矢志守節敬事翁姑不出戶庭者十八年堅貞克著

烈女

馮幺妹馮志貴女及笄未字隣人羅鳴釀調之女不從服毒殞命其母馮楊氏鳴於官並上控各大府案未卽決馮楊氏復遣抱赴京呈於都察院事聞奉
上諭交川督提案再訊羅鳴釀抵罪棄市馮幺妹准其
旌表發銀三十兩交伊家屬馮楊氏馮光燦呈領建坊